



Sebaldus honestis parentibus natus, & in omni genere literarum educatus est. Is cum artium fundamenta feliciter iecisset, sese hinc inde ad doctorum conuentus recepit, & in primis Mathematicis disciplinis incubuit. In ijs etiam tanto successu perrexit, ut uiris doctissimis compararetur. Accedebat & uitae integritas, & religionis amor. Id cum respub. Norinbergensis cognouisset, hunc Sebaldum liberali stipendio ad se uocarunt, & suam iuuentutem bonis literis imbuere iusserunt. quod quidem ipse singulari industria per multos annos fideliter praestitit, atque cunctis gratisimus extitit. Scripsit is de arte canendi lib. 2. quibus uerum signorum usum luculenter ostendit, & 1537 Norinbergae edidit. Deinde Nomenclaturam rerum per classes digestam uarias, atque Formulas colloquiorum puerilium, quibus Latinitatis copiam declarauit, atque usum linguarum suis discipulis familiarē reddidit. Cum

hoc modo instituendae iuuentuti incumberet, atque suis uigilijs sibi apud doctos magnum nomen comparasset, tandem obiit, & honorifice Norinbergae sepultus fuit, Con. Gest.